



EGUNKARIA

Woody Harrelson aktoreak eraso «arrazista eta inperialista» izango dela adierazi du.

Gerra hotsak isilarazteko ahotsak

IRAKI ERASOTZEAREN AURKA. Sean Penn aktorearen bidea jarraitu eta Bushen asmoen kontra azaldu dira AEBetako hainbat artista

Mikel Lizarralde | DONOSTIA

«Gerra saiheats daiteke». Esaldi bakar batek eta *etsaiaren etxera* eginiko bisitak Ameriketako Estatu Batuetako sektore eskuindarren etsai bihurtu dute Sean Penn aktore eta zinema zuzendaria. Jane Fondari ere gertatu zitzaion Vietnamgo Gerraren garaian, baina hark, gutxienez, gizaratearen parte handi baten babesa zuen. Pennek AEBetako gizaratearen gehiengoak erakutsi duen gerra gogoarekin borrokatu behar izan du.

Nolanahi ere, AEBetan eta George Bush presidentearen politika babesten duten herrialdeetan gerra hotsak gero eta ozenagoak diren honetan, kultur munduko zenbait pertsonak ere altxatu du ahotsa. Ez, ordea, Iraken aurkako erasoaren sustengatzeko, baizik eta gerrari ezeztatzeko. Pennek abenduan Irakeran eginiko bisitak eta bi hilabete lehenago *Washington Post* egunkarian Bushi idatzitako gutunak AEBetako gizaratea astindu dute, eta sektore eskuindar eta kontserbadoreek «etsaiak manipulaturako tenteltzat» jo duten bitartean, bere adierazpenek balio izan dute kultur munduko hainbat lagun gerraren aurka jartzeko ere.

Penn ez da AEBetako nazioarteko politika kritikatu duen lehendabiziko artista, eta ezaguna da Tim Robbins, Susan Sarandon, Jessica Lange eta Woody Harrelson aktoreek azken hilabeteotan azaldu duten

MUSIKA

Gerraren kontrako kantuak disko batean bilduta

Hollywoodeko artistak ez dira Iraki erasotzearen aurka agertu diren bakarrak. AEBetako zein Erresuma Batuko bakarlarik eta musika taldeek Stop The War Coalition plataformak eginiko eskaerari erantzun eta *Peace not war* diskorako kantu bana eskaini dute. Hor dira, besteak beste, Billy Bragg, Ani DiFranco, Massive Attack eta Public Enemy. Braggek, gainera, *The price of oil* (Petrolioaren prezioa) abestia Interneten jarri du eskura. «Ez iezadazue odol, izerdi, negar eta beste kakez hitz egin, dena petrolioaren prezioagatik da», dio kantuan.

gerraren aurkako jarrera. Lan-geek «amerikarra izateaz lotsatu» egiten zela adierazi zuen joan den urteko Donostiako Zinemaldian eta Woody Harrelsonek Iraken aurkakoa «gerra arrazista eta inperialista» izango dela esan izan du.

Nolanahi ere, Pennek orain arte isilik egon diren beste ahots batzuk ere altxarazi ditu azken ekimenekin. *Washington Post*-en bitartez, eta 56.000 dolarreko iragarki bat ordaindu

ondoren, «bonbei bonbekin, mutilazioari mutilazioekin eta hilketari hilketekin» erantzuten dion zikloarekin amaitzeko eskatu zion zinemagileak Bushi, eta, horretaz gain, «izu eta lotsa ondarea» ez uzteko galdegin.

Aktorearen esanek eta ekimenek izan dute eragina dagoeneko, eta joan den astean ehundik gora artista ezagunek Artists United to Win Without War (Gerrarik gabe irabaztearen aldeko artistak) taldearekin egin zuten bat. Besteak beste, Kim Basinger, Matt Damon, Anjelica Huston, Samuel L. Jackson aktoreek eta REM taldeko kideek aldarrikatu zuten eraso ez dela Irak armagabetezko bidea.

Bidegabekerien aurka

Bestalde, Not In Our Name (Ez gure izenean) AEBetako politika salatzen duen taldeak gerra gelditzeko eginiko eskaerarekin bat egin du AEBetako kontserbadoreentzat «liberal ezkertiarak» diren beste zenbait artistak: Robert Altman, John Sayles, Terry Gilliam eta Oliver Stone zuzendariak, Danny Glover eta Marisa Tomei aktoreek eta baita Tim Robbins eta Susan Sarandon ere.

«AEBetan bizi garen neurrian, gure ardura da Gobernuak gure izenean egiten dituen bidegabekeriei aurre egitea». Oraindik ez dira asko aldarrikapen horri babesa eskaini dioten artistak. Gero eta gehiago dira, ordea.

LABURAREN

ANTZERKIA

2002ko Ercilla Saria Amparo Rivelles aktoreari eman diote, antzerki munduko ibilbide profesionalagatik

Amparo Rivellesi eman diote 2002. urteko Ercilla Saria, antzerkiaren munduan eginiko ibilbide profesionalagatik. Orain dela 64 urte igo zen taula gainera lehenengo aldiz, eta antzerkian, zineman eta telebistan esperientzia handiko aktorea da. Gainontzeko atalei dagokienez, urtarrilaren 31n jakinaraziko dituzte Antzerkiko Ercilla Sarien beste irabazleak. Interpretazio onenaren saria eskuratzeko hautagaiak hauek dira: emakumeen artean, Concha Velasco, Charo Lopez, Analia Gade eta Enma Suarez; gizonezkoen artean, berriz, Emilio Gutierrez Caba, Rafael Alvarez *El Brujo* eta Paco Maestre. Errebelazio saria jasotzeko, berriz, Maria Adanez eta Maria Lopez aktoreak izendatu dituzte.

ARTEA

Abangoardiaren historiari buruzko tertulia egingo da gaur Zarauzko Olerti Etxean

Zarauzko Olerti Etxean gaur arratsaldeko 19:30ean egingo den abangoardiari buruzko tertulian, Hans Richter pintore eta zinemagileari buruz mintzatuko dira. 1910ean beraiek *arrabol-koadro* deitzen zioten arte-lanak egiten hasi zen, Eggelekin batera. 1921ean lan horiei zinemaren teknika aplikatzen saiatu ziren. 1941ean New Yorkera joan zen Richter, eta 1944 eta 1946 bitartean *Dreams that money can buy* koloretako filma zuzendu zuen.

MUSIKA

2003ko neguko denboraldiko lehen kontzertua eskainiko du etzi Bilboko Musika Bandak

Bilboko musika bandak 2003ko neguko denboraldiko lehen kontzertua eskainiko du etzi, 12:00etan, Arriaga antzokian. Lehenengo zatia, biolin eta orkestrarako kontzertua izango da. Lamote de Grignonek egokitutako Beethovenen pieza bat joko du Santiago Juan Martin biolinistak. Carmelo Bernaola bilbotarraren pasodoblea, Khachaturian armeniarren balletaren suite bat eta Borodin errusiarrak sortutako *Igor printzearen dantza polovetziarrak* ere interpretatuko dituzte. Sarrerak doan izango dira, eta dagoeneko eskuragarri daude Arriaga Antzokiko txarteldegietan.

ANTZERKIA

Calderon de la Barca antzerkigilearen obra jasoko du asteburuan Barakaldo Antzokiak

Barakaldo Antzokiak Calderon de la Barca antzerkigile espainiar klasikoaren *Casa con dos puertas, mala es de guardar* antzelana jasoko du ostiraletik igandera bitartean. Adolfo Marsillachek eginiko moldaketa da, eta Maria Jose Goyanes, Juan Carlos Naya, Alfredo Alba eta Marisa Segovias dira aktore nagusiak. Calderonek gehienbat drama landu zuen arren, antzezlan hau komedia bat da eta Alfonso Zurok zuzendu du.

BERTSOLARITZA

Gorka Iribar eta Markel Peñalbak irabazi dute Zumaia Gabonetako bertsopaper lehiaketa

Zumaia bertsopaper lehiaketa antolatutako Gabonetako V. Bertsopaper Lehiaketa, Joanito Dorronsoro saria, Gorka Iribarrek irabazi du helduen mailan. Gaztetxeotan, berriz, Markel Peñalba izan da txapeladuna. Bigarren sariari dagokionez, Urtzu Iribarrek eraman du gazteen mailan, eta Xabier Azkuek, berriz, helduen atalean. Zumaia etorkizunari buruz idatzi dituzte bertsoak. Jon Maiak eta Manu Garatek osatu dute epaimahaia.

ZINEMA

Ijitoi buruzko zinema zikloa egingo dute otsailaren Zornotza aretoan

Ijitoen kultura eta arazoei buruzko ziklo bat antolatu dute Zornotza aretoan. Otsailaren 4tik aurrera, lau film egongo dira ikusgai jatorrizko bertsioan. *Ijitoen denbora* film jugoslaviarra ikusteko aukera egongo da otsailaren 4an. 1976an Donostiako Zinema Jaialdian Urrezko Maskorra jaso zuen *Ijitoak zerura doaz* eskainiko dute 11n. 18an eta 25ean, azkenik, Tony Gatlifen bi film emango dituzte, *Eroa* eta *Atzerritar eroa*.